

Malaysia punya masa depan cemerlang...

Bahan asal dari Arkib
Negara Malaysia

Sambungan semalam ucapan
penangguhan Datuk Seri
Dr. Mahathir Mohamad
di Perhimpunan Agung UMNO

SIKAP dan pendirian, ini mestilah dicerminkan juga oleh penyokong-penyokong. Tidak ada tempat dalam pertandingan ini untuk terlalu gembira kerana kemenangan, atau perasaan muram dan kecewa kerana kekalahan. Semua penyokong kesemua calon hendaklah melupakan sahaja segala tuduhan dan kata-kata pedih yang dikeluarkan dan didengari di masa gelora kempen sedang berlaku.

Semua kita patut berikrar akan merapatkan semula barisan dan menentukan bahawa kekuatan parti tidak terjejas kerana proses demokrasi yang kita amalkan.

Kita mempunyai masih banyak kerja yang hendak diselenggarakan. Pemimpin-pemimpin UMNO yang lepas telah meletakkan asas yang kukuh dalam memperjuangkan cita-cita dan matlamat UMNO. Mereka juga telah menjayakan berbagai dasar dan rancangan ke arah mencapai matlamat UMNO. Adalah menjadi kenyataan bahawasanya sebahagian dari matlamat UMNO telah pun dicapai.

Namun perjuangan UMNO tidak akan berakhir, selagi ada UMNO selama itulah tugas yang hendak dilaksanakan untuk memperbaiki kedudukan orang Melayu, untuk Bumiputera, untuk agama dan tanahair, akan berterusan.

Hari ini saya dipilih sebagai pengganti YAB Datuk Hussein, sebagai Presiden parti UMNO. Bagi saya ini bukan sahaja satu penghormatan dari parti yang telah saya anuti sejak lama ditubuhkan pada tahun 1946, parti yang tidak berbelah-bagi taat setia yang saya tumpukan kepadanya, tetapi bagi saya ini adalah satu amanah dan tanggungjawab yang besar.

Saya sanggup memberi semua tenaga dan fikiran saya kepada UMNO selagi saya dihendaki berkhidmat dengannya. Dalam pada itu saya memerlukan sokongan dan bantuan dari rakan-rakan saya di dalam Majlis Tertinggi dan dari pemimpin-pemimpin dan ahli-ahli UMNO di semua peringkat, tiap-tiap seorang dari mereka.

Saya berharap, bahawa sesudah selosainya pemilihan pemimpin parti dibuat, kita semua akan lupakan segala kata-kata dan tindakan yang telah kita buat di waktu pemilihan, dan sebaliknya kita memperingatkan diri kita tentang perjuangan UMNO dan perpaduan yang diperlukan.

Sebagai sebuah parti yang demokratik, sebagai orang yang menerima konsep demokrasi marilah kita terima semua keputusan dengan semangat demokrasi. Tidak ada orang yang menang dan tidak ada orang yang kalah dalam pertandingan di dalam UMNO. Penerimaan keputusan proses demokrasi adalah kemenangan bagi UMNO. Sebaliknya penolakan keputusan yang telah kita buat adalah satu kegagalan bagi UMNO. Apakah kita mahu UMNO kalah jika kita betul-betul berjaya UMNO.

Kemenangan

Malaysia dan orang Melayu mempunyai masa hadapan yang betul-betul berpotensi. Namun demikian untuk mendapat hasil yang sepenuhnya dari potensi itu, sebuah kerajaan yang adil kuat dan stabil adalah diperlukan. UMNO memang telah mendirikan kerajaan yang adil kuat dan stabil sehingga kini.

Saya berharap rekod UMNO ini dapat dikekalkan setelah saya dipilih menjadi pemimpinnya.

Khidmat saya sahaja tentulah tidak mencukupi untuk mengekalkan kekuatan UMNO sebagai kerajaan. Untuk maksud ini saya memerlukan skonggan yang tidak berbeah bahagi dari semua pihak di dalam UMNO dari semua negeri, bahkan semua bahagian dan cawangan.

Kejayaan UMNO adalah kejayaan kita semua, bukan kejayaan seorang dari kita sahaja, walaupun hanya seorang sahaja dari kita yang menjadi Presiden parti.

Oleh itu marilah kita berikrar semula akan taat setia kita kepada parti dan kesanggupan kita berkorban untuk parti, untuk agama, bangsa dan tanahair.

Sekali lagi ingin saya ucapkan terima kasih yang tidak terhingga kepada para wakil bahagian dan UMNO keseluruhannya kerana diberi kepercayaan untuk memimpin parti kita, UMNO. Saya pohon taufik dan hidayah dari Allah S.W.T. mudah-mudahan UMNO di bawah pimpinan saya akan berjalan baik seperti UMNO di bawah kepimpinan Dato Onn, Tunku Abdul Rahman, Tun Abdul Razak dan Datuk Hussein. Mudah-mudahan saya akan dapat menyerahkan UMNO kepada pemimpin yang akan datang dalam keadaan kukuh dan berpadu seperti mana yang telah saya terima. Inilah doa saya kepada Tuhan Rabbulalamin dan inilah juga yang saya pohon saudara saudari doakan bersama.

Kita akan bekerja, dan bekerja kuat di samping kita menyerah kepada Ilahi. Sesungguhnya perjuangan kita adalah sebahagian dari ibadah untuk kebajikan agama, bangsa dan negara. Semuga Allah yang maha kuasa merestui perjuangan kita. Kepada Y.A.B. Datuk Hussein sekali lagi saya ingin menyampaikan terima kasih kerana memudahkan proses penarikan kepimpinan di dalam parti. Di dalam dunia yang mana pemimpin sukar mengunduri diri tanpa paksaan, sikap Datuk Hussein tentulah disanjung tinggi. Kita di dalam UMNO, bahkan negara berbangsa dengan sikap negarawan Datuk Hussein. Sejarah akan mencatatkan peristiwa ini sebagai satu peristiwa yang dimulakan dan dihormati.

Bagi pihak UMNO dan ahli-ahlinya di semua peringkat izinkanlah saya mendapat penghormatan ini untuk merakamkan perasaan kita bersama akan rasa

kehilangan kita di atas pengunduran seorang pemimpin yang kita kasih; seorang negarawan yang telah menyumbangkan jasanya kepada negara, seorang ketua yang terkenal dengan sifat-sifat tegas, jujur dan berdisiplin dan seorang Presiden yang mempunyai imejnya yang tersendiri di dalam UMNO. Kita sama-sama doakan supaya Y.A.B. Datuk Hussein dan Yang Berbahagia Datin Suhallah dan keluarga beliau akan terus dilimpahkan rahmat dan kesejahteraan oleh Allah S.W.T. dan dipenuhi dengan sepenuh kebahagiaan. Kepada Allah kita pohonkan supaya kesihatan Datuk Hussein akan terus bertambah baik.

Kepada Y.A.B. Datuk Hussein saya meletakkan harapan supaya masih bersedia memberikan kesempatan kepada saya nanti untuk dapat terus menghubungi dan menemui beliau dari masa ke masa. Saya percaya bahawa pengalaman yang ada pada Datuk Hussein sebagai seorang negarawan akan dapat memainkan peranan penasihat yang berguna selaku abang tua kepada kita.

Kita baru sahaja selesai menghadiri satu perhimpunan yang bersejarah bagi UMNO. Kita dapat berbangga di atas sejarah yang sama-sama kita ciptakan ini. Kita telah dapat membuktikan kepada dunia betapa berdisiplinnya ahli-ahli dan parti kita. Walaupun kita menghadapi saat-saat penting untuk menentukan pimpinan parti, kita telah melaksanakannya dengan penuh disiplin dan kematangan, dengan penuh sopan dan santun hingga pengundian dapat berjalan dengan penuh tertib dan teratur. Di sinilah kekuatan UMNO, kekuatan kita bersama.

Kita akan kembali ke tempat masing-masing selepas perhimpunan ini ditangguhkan. Walaupun kita akan kembali ke tempat masing-masing tetapi saya yakin dari segi semangat dan arah perjuangan kita tetap bersatu dan menuju arah matlamat yang sama. Sekali lagi saya mengucapkan selamat berjuang, maju dan terus maju.